

## Skoudou

Nier če piliū, ni dèdèliū buokštu,  
Ni donguoraižiu, kalnu, ni jūru,  
Bet ta dèl kuo parētè če truokšto?  
Nes tavėjē baltiausè mon mūra.

Bartovelè bangou tīlē, ramē,  
Džiogèn kvietkuom prēmargintas lonkas,  
Līg ta opès žemaitėška tarmie  
Èr vienībie sojungtas mūs ronkas.

Nier če buokštu, ni dèdèliū pèliū,  
Vuo ta dèl kuo tēp tonkē plak šèrdès?  
Vuo ta dèl tuo, ka tavèm aš mīlio,  
È ka pruotieviu žuodi da gèrdo.

Mūsa vakā, anūkā soprāta,  
Kuoki dūšiuo sodiejuom mes kraiti,  
Prasèsoktè gal šimts laika rātu–  
Mes kāp esam, tēp būsem žemaitės.